

**O B R A Z L O Ž E N J E**  
**UZ STATUT REGULATORNE KOMISIJE ZA ENERGIJU**  
**U FEDERACIJI BOSNE I HERCEGOVINE**  
**USVOJENOG NA XVIII REDOVNOJ SJEDNICI 30.10.2013. GODINE**

**I PRAVNI OSNOV**

Pravni osnov za donošenje Statuta Regulatorne komisije za energiju u Federaciji Bosne i Hercegovine sadržan je u odredbi člana 36. stav (1) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13) kojim je propisano da Regulatorna komisija donosi Statut kojim se uređuje upravljanje i organizacija Regulatorne komisije.

**II RAZLOZI ZA DONOŠENJE NOVOG STATUTA**

Dana 05.09.2013. godine stupio je na snagu novi Zakon o električnoj energiji u Federaciji Bosne i Hercegovine („Službene novine Federacije BiH“ broj 66/13) od kada na teritoriji Federacije BiH prestaje primjena Zakona o električnoj energiji („Službene novine Federacije BiH“ broj 41/02 i 38/05).

S obzirom da Regulatorna komisija za električnu energiju, osnovana Zakonom o električnoj energiji („Službene novine Federacije BiH“ broj 41/02, 24/05, 38/05, 83/11) u skladu sa članom 115. stav (1) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13) (u daljnjem tekstu: Zakon), nastavlja sa radom prema odredbama ovog Zakona, te u skladu sa članom 17. stav (1) istog Zakona mijenja ime u Regulatorna komisije za energiju u Federaciji Bosne i Hercegovine, kao i zbog izmjene i dopune nadležnosti i obaveza Regulatorne komisije za energiju u Federaciji Bosne i Hercegovine, došlo je do potrebe usklađivanja Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04) sa navedenim Zakonom i poboljšanja teksta istog.

Kako je zbog navedenog potrebno promijeniti naziv osnovnog propisa, kao i izmijeniti, odnosno dopuniti više od polovine članova osnovnog propisa, u skladu sa članom 46. Jedinstvenih pravila za izradu pravnih propisa u institucijama Bosne i Hercegovine („Službeni glasnik BiH“ broj 11/05), pristupilo se donošenju novog propisa, odnosno Statuta, a sam tekst je usaglašen sa navedenim pravilima u smislu označavanja na odgovarajući način podnaslova, članova, stavova, tačaka i alineja, kao i u smislu određivanja naziva članova.

Preambula Statuta Regulatorne komisije za energiju u Federaciji Bosne i Hercegovine, kao i naziv Statuta usaglašeni su sa članom 17. Zakona o električnoj energiji u Federaciji Bosne i Hercegovine, dok su odredbe Statuta grupisane u devet dijelova.

Dio prvi sadrži opšte odredbe koje se odnose na predmet Statuta, pravni osnov i cilj osnivanja Regulatorne komisije, naziv i sjedište, pravni status Regulatorne komisije, kao i odredbe o samostalnosti Regulatorne komisije, pečatu, znaku, memorandumu i bankovnom računu. Ovaj dio je formulisan u skladu sa članovima: 2., 17., 18., 19. i 20. Zakona o električnoj energiji u Federaciji Bosne i Hercegovine. Takođe ovaj dio obuhvata i pregled sadržaja Statuta.

Dio drugi sadrži odredbe vezane za nadležnosti i obaveze Regulatorne komisije usaglašene sa članovima 21. i 22., kao i drugim članovima Zakona o električnoj energiji u Federaciji Bosne i Hercegovine kojima se propisuju nadležnosti i obaveze Regulatorne komisije. Odredbama o unutrašnjoj organizaciji i rukovođenju organizacionim jedinicama Regulatorne komisije propisuje se šest organizacionih jedinica kao i imenovanje sekretara Regulatorne komisije što je propisano članom 25. stav (4) Zakona, te su ove odredbe formulisane uzimajući u obzir da se opis poslova i djelokrug rada pojedinih sektora propisuje Pravilnikom o radu, a ne Statutom.

Dio treći kojim se reguliše način rada Regulatorne komisije sadrži odredbe vezane za imenovanje, sastav i mandat članova, te funkciju predsjednika Regulatorne komisije. S obzirom da Zakon o električnoj energiji u Federaciji Bosne i Hercegovine u članovima od 25. do 31. sadrži detaljne odredbe o navedenom, Statut upućuje na Zakon. Ovaj dio sadrži i odredbe vezane za nadležnost predsjednika i prava i obaveze članova Regulatorne komisije, kao i odredbe vezane za način obavljanja dužnosti u Regulatornoj komisiji kako za članove, tako i zaposlenike FERK-a. Odredbe vezane za javnost rada, sjednice, glasanje i donošenje odluka, akte Regulatorne komisije i njihovu objavu formulisane su u skladu sa članom 32. Zakona.

Dio četvrti sadrži odredbe vezane za finansiranje i budžet Regulatorne komisije koji je usklađen sa članom 31. Zakona.

Dio peti reguliše transparentnost rada Regulatorne komisije i sadrži odredbe o načinu informisanja javnosti.

Dio šesti reguliše zaštitu povjerljivih informacija, dostavu povjerljivih informacija Parlamentu Federacije BiH, obaveze članova i zaposlenika Regulatorne komisije da čuvaju povjerljive informacije, kao i obavezu Regulatorne komisije da putem pravilnika donese procedure za zaštitu istih, sve u skladu sa članom 32. stav (6) Zakona.

Dio sedmi sadrži odredbe vezane za mogućnost članova Regulatorne komisije da predlažu izmjene i dopune statuta, kao i da se iste donose na način i po postupku propisanom za njegovo donošenje.

Dio osmi sadrži odredbe o davanju saglasnosti na Statut i tumačenje istog koji je formulisani u skladu sa članom 36. Zakona.

Dio deveti sadrži prelazne i završne odredbe i sadrži odredbe o načinu čuvanja originalnog primjerka Statuta i njegovo stupanje na snagu.

### **III FINANSIJSKA SREDSTVA**

Za provođenje novog Statuta Regulatorne komisije za energiju u Federaciji Bosne i Hercegovine nije potrebno izdvojiti posebna sredstva u budžetu Regulatorne komisije za energiju u Federaciji Bosne i Hercegovine.